

DEO OPTIMO MAXIMO, UNI ET TRINO.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS.

*manè discutienda in Scholis Medicorum, die Martis decimâ septimâ
mensis Aprilis, anno Domini M. DCC. LXIV.*

M. CAROLO PAYEN;

Doctore Medico, Præside.

Num suæ sint animi angoribus etiam inter opera Chirurgica noxæ?

I.



EQUI bonique æstimatoris est faciles præbere aures laudibus quæ Chirurgiæ hodiernæ meritò tribuuntur, atque interdum succinere. Voce unanimi Chirurgicum armamentarium instrumentorum in melius mutatorum præstantia commendatus, & in dies solerter exco-
gitatorum numero & apparatu ditius celebratur, non secus ac elegantiori artificio injectæ deligationes. Curiosus perlustrati vasorum ductus, explicatæ nervorum propagines, exploratæ fibrarum connexiones, & anatomico cultro reclusa corporis humani penetralia monstraverunt iter quo tutius rectiusque ad malè affectas sedes medela pertingeret. Præclara illa sanè, sed quorum pleraque temporum seriei, repetitis calibus, experientia successionebus tribuenda sunt porius, quàm intellectu & iudicio. Docent enim artium mechanicarum exempla leviores ingenii igniculos impendi in iis quæ expeditiorem operam promittunt, tum aptioris organi applicatione, tum minori materiei elaborandæ dispendio ex perspecta ipsius textura. Nec illas prætergredi metas sinunt caliginosæ nubes quæ ingenuæ institutionis expertes bonarumque litterarum rudes, & ad solam imitationem flexiles & infortunatas mentes circumdant & impediunt. Hinc præjudicatarum opinionum ampla seges quæ commissa novarum idæarum germina statim suffocat; hinc pro domesticis usibus stupidè pervicax studium: hinc promptum & acre odium adversus novas methodos & operandi formulas, quas patienter audire recusant, nedum intelligant. Quam longè alia est nostri ævi Chirurgiæ fors & conditio! Jam fortuitis naturæ conatibus obsequiosi artis illius cultores nobiliori fiducia tentaverunt ferro non violare & in integrum aliquatenus restituere partes quas rescindendas veluti pondus inutile, imò perniciosum ætates superiores pronuntiaverant. Nunc nihil nos vetat spes inchoare futurum ut Philosophiæ radiis illustrati apprime dignoscant quibusnam momentis præcipuè in æconomia animali tum sanæ, tum læsæ partes sint demandandæ. Ex quo enim illa Medicinæ pars à studio sapientiæ quasi diducta cum eo iterum coire videtur, jam non licet Empyricorum more illam exercere, & ex physicis principiis satisfaciendum est sciscitanti, quid in curationum decursu moras necesse reditura secunda valetudini, quid cuncta artis molimina reddere queat vana & irrita. Culpandus ergò foret quisquis aut ignoraret aut floccificaret ea quæ in æconomia animali turbas movere possunt inter opera chirurgica. Scilicet cum ex opportunâ humorum temperatione, ex pacato illorum fluxu, ex æquabili motuum rythmo pendeat certius quàm ex operantis industria tota sanationis fortuna.

II.

OPERUM Chirurgicorum nomine hic intelligimus, vulnus arte factum alicui corporis parti jam per se malè habenti, & ex cuius vitio pessumdatum universa machina. Non nunquam tali artificio per partes illibatas via aperitur ut extranea è

cavitatibus recludantur. Undenam mali labes? nūm à causâ internâ, nūm ab externâ, parūm nunc refert disquirere. Juvat solummodò attendere quod in vulnere per accidens robusto & sano homini inflicto vires vitæ incorruptæ sanationis terminum possunt remove; dum è contra in vulnere quod sit de proposito, consultò, aut de industria, sæpè sapius multū de corporis robore jam perierit, prius exantlati laboribus. Cæterū utrinque primis diebus eadem sunt pertimescenda accidentia, nempe, hæmorrhagia, convulsio, inflammatio, dein gangrena, &c. His autem, si supervenerint, compressis ad repletionem & glutinationem pariter contendendum est. Quæ ut prosperè succedat pari diligentia cavendum ne ros vitalis allabens nimia crassitudine aut tenuitate peccet, ne canales justo strictiores exitum huic denegent, aut laxiores non aptè elaboratū effundant. Summum porrò prudentiæ erit opportunè occurrere humorum diluviis quæ nervosarum partium vellicationibus & commotionibus succedunt, & præcavere fibrarum resolutiones quæ productos tigores & distensiones excipiunt. Verū oblata hæc similitudo non-ne dat suspicari quid sentiendum de solemnī corporis preparatione antequàm chirurgicum auxilium experiat, & quibusnam remediis possit reverà præmuniri adversus imminentiā. Nam si aliunde sanum esset, quo sine præsentem statum intervertere? Si autem aliqua subesset labes, nihil omninò movendum, donec, quo fieri posset, propior sanitati valetudo revocata esset. Undè anceps magis haberi posset vulneris fortuito illati eventus, quam operis Chirurgici: quando quidem temporis electio ex arbitrio medentis pendeat. Et quod periculum minuit & sanationi non parum favet; quandò *Chirurgus vulnus facit non accipit*, ut Celsi verbis utar, penes illum est continui solutionem ultra quàm par est non protendere, ferrique dimovere aciem à partibus, quæ alias omine infaulto attingerentur. Aliundè ergò irruant necessum est calamitates quæ chirurgicas curationes periculosa plenis alæ operibus annumerant. Forsan sibi met nocet, & felicem exitum invidet tædia exasperando hominī cui opitulari volunt diversa conditio & indoles varia. Tantumne valent animi angores, quibus intereà exagitat, ut perturbarent naturæ & artis consilia?

III.

HOMINEM constare mente & corpore fatentur cordati omnes. Inter utramque substantiam mutuū intercedere commercium ultro agnoscunt; licet societatis leges & vincula iudicio assequi prorsus nequeant. Quotidiana interim probat experientia ob unitis consortis agnitiones alterum plecti, & vividum ingenii acumen cum sanitatis flore simul evanescere & regredi. Longum nimis foret hic recensere alia gravissima argumenta quibus evincitur quanta efficacia in se invicem agant. Attamen nescio quo fato in horas contingit, ut qui circa mentis humanæ regimen versantur, ab ea expectent, quæ à corpore soluta, & sui juris prestare vix compos foret: dñm ex adverso qui corporis curam gerunt, quoties aliquid molendum est, toties conjugatæ mentis obliviscantur potentia, illudque tantum-modò pro mole solidorum & fluidorum in motus qualiter-cumque excitatorum habeant. Sua videant & procurent morales Philosophi. Perpendere impræsentiarum lubet aut aliquid hætenus ausi sint illi quorum est artificiosæ manuum subsidio adversus malorum insultus corpus tueri, ut à se oblivionis hanc notam propulsarent. Statim invenimus illos ubique advertisse ne ægrum curis & sollicitudinibus morosum anxiumque curationis periculis committerent. Videmus illos callida benevolentia ægros officiosè deludere ne citius iusto horam ad opus conditam ipsis revelent. Paulatim verborum lenocinio sensus assuescere docent doloribus. Sensum formidinem excuriunt, injecta spe levaminis & redintegrationis; usque adeo censent serenam mentem liquida & solida irradiare iusta temperie, & attonitos fractosque animo languere subito & marcescere. Sic etiam opere peracto cautè depellunt & compefcunt animi æstus tūm latos tūm malignos, qui tranquillam æconomia animalis faciem momento in turbidam & procellosam converterent. Ubi vero ad opus se accingunt, jam non sibi constant. In alios homines mutatos illos libenter diceres. Tenacius iusto memores præceptorum Celsi omnem misericordiam exuunt. Parūm abest quin induceris ad credendum ipsis non amplius cum sui similibus, sed veluti cum trunco aut stipite

rem esse. Oculis solummodò inhaeret ferri mucro vel acies ne obertans offendat partes quas tangere nefas Quasi verò damnosa foret una hæc incuria, & salutis spes in manu strenua digitisque industriis tota resideret. Proinde parvi faciendi essent terrores & angores interni quibus animo linquitur æger & collabescit. Hanc securitatem & confidentiam brevi deponerent si vel leviter considerare vellent instantem ægri statum. Hoc temporis puncto sensus omnes refugiunt & trepidant ad attackum urentem instrumentorum: contremiscit genus omnè nervorum ob membranarum velli- cationes & dilacerationes, & inhorrescit præ ligaturarum tormentis. Tùm emota, ut ita dicam, è suis sedibus anima, primùm vitales cunctas facultates ad auxilium sollicitat, ærumnarumque profligationem. Paulò post quasi victa farscit. Verùm nec ipsi quieti quæ tanrò subsequitur tumultus fidere datur. Suis etenim non vacat perfidiis dolosa hæc serenitas. Rigidæ torpent fibræ motuum organa: circum præcordia, circa sensuum arcem morantur ferali gelu suspensi sanguinis rivi; donec refocillatis paulisper viribus fremebunda natura in novos furores rapiatur, & adversus obices insurgat novas effectura tragedias.

I V.

AD has tristes incitas redactam ægri vitam mœrens quis revocare non optaret primavæ chirurgiæ conditorum beatam conditionem, qui, Herculis more, igne ferroque armati monstra morborum debellabunt. Nec feritas remediorum, nec unguentorum applicatorum simplicitas, nec rusticitas deligationum curacionis exitum procrastinabant. Attamen omni depulso stupore fateri cogimur dubiam illis palmam reddere atroces ægrorum animos, firmitudine cum auxiliorum diritate certantes, nostrisque temporibus hæroicam hanc medicinam felicitate pariter & laude facile cessuram. Pingamus nostra cogitatione imaginem gentium Americarum, homines non tam rationis lumine quam aptitudine ad illud assequendum civilibusque officiis manifestandum à feris distinctos; suprà captum humanum ad omnem patientiam induratiore; qui, ut paucis absolvam, adeo ferrei sunt, ut divulsis interraneis semiustisque artubus tortorum iram cantu & convitiis adhuc provocent & accendant. In simili corporum cæcitate sicut oportet mentis energia ad hunc pervicacia gradum longo usu unice directæ, imperiosoque aliarum idearum stimulo destituta. Fidem quoque vestram sollicitabimus exemplis eorum qui eò securius, eò certius tum à vulneribus, tum ab operibus chirurgicis resurgunt, quo exactius ærea illa pectora referunt. Quotidie cernimus, rusticos & homines infimæ plebis, gregarios quoque milites, ut ut ruditer tractatos, ex horrendis vulneribus brevi convalescere: dùm urbani, centuriones, duces & optimates cunctis vitæ commodioris molliis & luxu affluentes, atque arte solertiori sublevati per varios & ancipites casus vix ac ne vix emergunt multò levius sauciati. Quin imò, teste *Baglivio*, pavor & ignavia in vulnus excipiente difficiliorem quandoque reddunt sanationem, quandoque artis virtutem superant; propter adventitiam fibrarum inertiam, imbelli laxatorum nervorum succussu nullatenus suscitandam. Non mirum ergo si rusticola cunctis doloribus pectus inaccessum offerens, attamen mortis formidini haud impervium, animosè ferat sectionis cæsareæ cruciatus contra quos affligenti spe retinendæ vitæ præmunitur. Talem animum afflare frustra molireris Matronæ quæ ad ferri conspectum acerbæque sensationis ideam rota præ horrore convellitur atque penè deliquescit. Quod si languoris momenra saluari auxilio impendere auderes, non te fugiat quanto in discrimine res versetur soluta & quasi distracta animæ luctationibus corporis compage. Certissimo equidem argumento gratam donorum mentis usuram corporis commodorum iactura non nunquam redimi. Majus idcirco periculum inter opera chirurgica eos obire qui magis intelligentia & exquisito mobilliorique sensu præpollent, quoties & quandiu has dotes pro arbitrio exercere illis situm est.

V.

A CRI meditatione de phænomenis quæ reciprocam actionem mentis in corpus, & corporis in mentem vel antecedunt, vel comitantur, perspicimus, non deesse artificium quo intimæ unionis illius nodi adeo remissi sunt, ut ferè disrup- ta,

aut saltem suspensa prorsus appareant fœdera. Sic ad plenioris solatii & juvaminis gloriam ars sanandi evehitur, quam si in otiosa relatorum accidentium prævisione aut mera consideratione quiesceret. Scimus fidas vigilum sensuum excubias, lucis instar, mentem dolorifica sensatione expergefaceri & admoneri, cum instat molesti aliquid. Scimus quoque animum in alta contemplatione defixum huic monito sæpe non respondere, nec prius illatae noxæ fieri confcium, quam suum fervorem compescuerit, & sese recollegerit. At nec in volentis potentia, nec pro iubentis nutu adest hæc doloris vacuitas. Ad physica adjumenta si nos convertamus, reperiemus primo ope laqueorum comprimi nervos, & reverà obscurari dolorem acrem; sed non tolli omnino, & cunctorum quæ extus peraguntur participem remanere animum, aut incensum suspitione latentium fieri anxiozem & agitatiorzem. Adde quod æquè commodè ad quascumque indiscriminatim partes nec aptantur, nec alligantur laquei. Neque magis sectioni aut ustioni sentientis nervi locus datur, præcipuè in partibus ad quarum sensum plurimi concurrunt nervorum rami ex diversis truncis oriundi. Unicum saltem restat confugium & certum asylum in expescacientibus medicamentis, quæ velut incantamento animam à corpore extrahere, & vagam procul à dissociato consorte aliquandiu tenere valent. Sensus suos ministris auscultare impar est, sive quantiantur nervi ipsis dicati, sive contremiscant vibrentque. Per universum corpus propagatur horum medicaminum efficacia quàm intendere aut minuire pro lubitu poterit quicumque sedulo inquisiverit quid & quomodo agant. Est insuper genus aliud medicamentorum illis suppar: *Tonica* vocant. Fibrarum tum nervearum, tum carnearum laxitati & inertia opitulantur, sicque resolutionis arcent periculum; cum his quoque humorum stagnationibus & corruptionibus obviam itur. Priora tollunt animo conscientiam violentia externæ, & aliquo modo suppleant hanc constantiam & firmitudinem, superius celebratam, ad quam ne memores nostri avi assurgant prohibet ingenua indoles simul & acquisita. Posteriorum applicatione robor temporarium fingitur in fibris, ut minus noceant enervata vires humorum effluxu aut exhalatione, ut illorum debita crasis foveatur & abnormes coactantur patiens conditio, à quibus tot strages agrotum & medicamentum cruces. Utrisque rite adhibitis quot aliunde calamitates averterentur. Sed imprimis spastici illi dolores qui partem à vulnere remotam caput v. g. aut præcordia stringunt & vitam, velut aura pestilens, adimunt. Omnem infortunii metum solabantur industria peractum opus chirurgicum, læta vulneris facies, donec dolor ille maleficus, fulguris in modum, procellam adventare nuntiaret. Undenam illa, nisi à prius turbato & infirmato ob animi anxietates fibrarum medullæ cerebri tenore. Concludere hinc licet,

Ergo sue sunt etiam inter opera. Chirurgica animi angoribus noxa.

DOMINI DOCTORES DISPUTATURI.

M. Natalis-Andreas-Joannes-Baptista CHESNEAU.

M. Joannes-Franciscus PARIS, Anatomes & artis Obstetriciæ in gratiam Matronarum Professor.

M. Dionysius - Claudius DOULET,

M. Bartholomæus-Tuffanus LE CLERC.

M. Ludovicus Gabriel DUPRÉ, Serenissimi Principis Condai Consiliarius Medicus.

M. Antonius PETIT, à Regiâ Scientiarum Academiâ.

M. Claudius-Carolus DE JEAN.

M. Franciscus - Felicitas COCHU.

M. Josephus DE JUSSIEU, Regiâ Scientiarum Academiâ Socius.

Proponebat Patris MATTHÆUS-THOMAS LA CASSAIGNE, Parisinus, saluberrimæ Facultatis Medicinæ Parisiensis Baccalaureus.

A. R. S. H. A SEXTA AD MERIDIEM.